



QUÆSTIO MEDICA
CARDINALITIIS DISPUTATIONIBUS
MANE DISCUTIENDA
IN SCHOLIS MEDICORUM,
Die Jovis 19. Martij,
M. JACOBO THEVART,
DOCTORE MEDICO, PRÆSIDE.

An ex aëris & diætæ vitio scorbutus?

I.

QUICUNQUE humanum corpus infestant morbi, aut ex proprio cujusque vitio, peculiari diætâ & errore in victus ratione commisso, aut ex universali quadam omnibus causâ procedunt. Illi dispersi, hi communes nuncupantur. Universalium causarum prima & potentissima aër est *μῆγς* & *δυσήμς*, cujus usus cunctis viventibus necessarius. Ab eoesculenta sunt & potulenta omnibus ex æquo obvia. Inter morbos communes & contagiosos suo merito annumeratur scorbutus, affectus non novus, nec hoc solum sæculo observatus, sed Hippocrati, aliisque veteribus cognitus exquisitè. An idem ille est qui in Germania trans Rhenum, castris à Germanico Cæsare positis maritimo tractu totum vexavit exercitum, ubi aquæ cujusdam dulcis & fontanæ potu intra biennium dentes deciduos compagisque genuum laxamenta passim observare licuit. Certè illud vitij stomacacen & scelotyrben Medici vocare, quòd eo laborantibus & os *κακῶς* oleret, ob maligna ulcera supercrescentemque in gingivis putridam fœtidamque carnem, & crura pe-

desque gradiendi impotentiam paralyseos æmulam contraherent ob nervorum è lumbis prodeuntium à maligno sero madefactionem. Accedunt diri cruciatus ventris quibusvis medicamentis ægrè curabiles, sædus faciei color, maculæ nigricantes, quorum ratione oscedo, gingipedium, arquatus niger, vitiligo nigra, & ileus hæmatitis pravus ille affectus à variis appellatus fuit.

II.

SCILICET scorbutus cachexia est & mala corporis nutritio occultave quædam qualitas toti corpori, sed præcipuè lieni impressa, quam potissimum parit humor melancholicus, crassius, fœculentus, & serosus, peculiari ratione corruptus. Hujus certa sunt *σημεία*, lienis durities, hypochondriorum tensio, tussis, spirandi difficultas, crurum & pedum tumor œdematosus, renum dolor, lumborum gravitas, lassitudo corporis, sædus faciei color, gingivarum corruptio, oris graveolentia, cum ulceribus variis, ventris segnitie, doloribus *νευρῆναις*, maculis ex rubro livescentibus. Tam diri affectus causam si quæras, prava est vivendi ratio aëris impuritati juncta, à quibus viscerum fit *κακοεχμία*, malignæ istius luis parens & origo. Hæc non una ratione virus suum confert: quosdam contagione adoritur fœdiore osculo, ut olim mentagra Plinii, alios accubitu, alios comotatione; quæ parentalis est & hæreditaria, illa *διάρρη*; quæ à solemnî mensium, hæmorrhoidum, varicum suppressione orta, *δυσέκμηνον*. In Gallia scorbutus ante aliquot annos vix notus, in plagis Septentrionalibus, Frizia, Pomerania, Saxonia, & maris Balthici accolis endemium erat & vernaculum malum, velut in littore Britannico, ubi abundè cochlearia luis scorbuticæ alexipharmacum, sponte se profert, quasi Dei optimi max. sapientiâ factum sit, ut ubi ob loci naturam morbi aliqui vernaculi & endemij sunt, ibi domestica remedia ad manum veniant, & copiosè luxurient.

III.

LIEN jecori oppositum viscus tanquam *ἀντίζυγον* & nothum hepar mirâ naturæ providentiâ factum fuit ut laboranti jecori subveniat ad sanguinis confectionem. Hac peracta vi & calore parenchymatis, cui funus malè dixere quidam, bilis ad vesiculam fertur, serum ad renes & vesicam, melancholicus humor per ramum splenicum ad lienem. Hunc autem dum proprio calore & arteriarum motu subigit, attenuat, & ad sui nutritionem disponit, crassior & fœculentior portio, quæ partis conatum elusit, nunc in portam & intestina, nunc in ventriculum & renes fausto secessu amandatur. Itaque eo defæcandi depurandique munere si frustretur lien, totius corporis œconomia perturbatur, labefiunt humores, spiritibus tenebræ offunduntur, teter & malignus ad cor & cerebrum effertur vapor: Quid plura? Ab hujus licet ignobilioris visceris infarctu dependent melancholia hypochondriaca, icterus niger, fœdi virginum & mulierum colores, & tandem Hippocratis lienes magni, seu, quod idem est, scorbutus noster; dum enim à liene principis velut fisco, ma-

lignus quidam humor & ichoroeidis exundat in varias corporis partes, oris graveolentiam, crurum impotentiam, fluxiones erraticas & rheumaticas diatheses excitat, fixasque & consistentes in certis partibus destillationes parit: sic quibus lien floret, iis corpus minuitur & contabescit, viscusque hoc arboribus merito simile dici potest, quarum radices amaræ & ingratae, fructus verò dulcissimi.

IV.

INSPIRATI & circumfusi aëris, ut cibi & potus ad immutanda corpora magna vis est & efficacia. Ille morborum opifex qualitatum immoderatione, substantiæ vitio, & subitâ insolentique mutatione non minima damna confert. Cibus autem & potus dum permanentem & inhærescentem materiam suppeditant, gignendis morbis pabulum non læve sufficiunt. Ad declinandam luem scorbuticam, tanti facienda est aëris, esculentorum & potulentorum bonitas & salubritas, ut melior diæta morbi teterimi præsens observetur auxilium: Liquet illud belle vel eorum testimonio qui Indiam orientalem navigarunt, apud quos pro comperto est, scorbuticos in navibus aëris cibique & potus vitio factos & pro conclamatis habitos, ubi in insulas transferuntur paucorum mensium spatio, levi aliquo præsidiorum usu pristinae valetudini restitui. Hanc labem qui refugit, eligat aërem purum, tenuem, bene temperatum, qui sanguinem attenuet, spiritus collustret, coctionem juvet, & excrementorum expurgationem procuret: Caveat cane pejus & angue crassum, densum, caliginosum, nebulosum, alienæ rei permistione inquinatum, hominumque halitibus multis conspurcatum: nec minor sit in cibis delectus, qui euchymi & *antieris* usurpentur, vitatis carnibus bubulis, porcinis, & maximè salis conditura diù asservatis, piscibus item, leguminibus, lacticiniis, aliisque crassæ compactæque substantiæ edulius: Panis oggeratur filigineus aut similaceus, non ater, azymus, biscoctus, nauticus, & spumâ cervisiæ fermentatus: Potus sit divinus, non pelusiacus, sit & aqua purissima, levissima scorzonera, cochleariâ, nasturtio, & similibus medicata, non putealis, stagnans, & nimia morâ fœtus: nec vino interdicator, quod velut potulentorum optimum & cordi anicum spiritus reficere humoresque corporis aut facere meliores aut laudabiles conservare potest.

V.

UT nulli ætati, sexui, regioni parcit scorbutus, ita nullo non tempore sievit & debacchatur: Vernâ tempestate saluberrimâ licet quâ cuncta animalia nimietate verni pabuli quodammodo exhilarata lasciviant, corporaque vitiosis humoribus repurgata novis velut succis repubescunt, frequentissimè tamen grassatur; vexat & perfacile autumno, quo tempore febres quartanæ, erraticæ, aliique homogenei affectus sobolescent. Contumacem hunc & refractarium hostem si perdomare contendas, institutâ victus ratione, aërisque delectu facto, à venæ sectione ducendum initium, modò non à leipothymiam, ut in acutis

febris; salvatellæ apertio ab Anglis in hoc affectu probata, & ab Arabibus in morbis melancholicis pluris æstimata, magni est apparatus & pauci proventus; purgationes blandæ & frequentes primùm, dein ad effectum factæ multam impuritatis omnis generis copiam educant; Ab emetico & hydragryosi nihil opis expectandum: Opiatæ antiscorbuticæ purgantes & cardiacæ ex theriaca, Confectionibus Alkermes & de hyacintho veniant in subsidium, additis succis cochleariæ, nasturtij aquatici, beccabungæ, absinthij, chelidonij, fumariz, aliarumque herbarum sale volatili copioso abundantium. His artibus crassius melancholicusque humor attenuetur & incidatur, simulque huic adjuncta cacoethia corrigatur & emendetur: Neque verò omittenda sunt topica remedia, emplastra, cataplasmata, foci, litus, ad lienem, crura, tibias, lotiones & gargarisinata ad gingivarum exulcerationes & oris graveolentiam, quibus, sed potissimùm aëris & loci mutatione, laudabili victus ratione & convenienti rerum omnium administratione, curâ & diligentia Illustrissimorum & Sapientissimorum D. D. Rectorum Nosocomij Parisiensis factum fuit ut institutâ scorbuticorum ad D. Ludovici valetudinarium translatione, contagiosa & maligna isthæc lues scorbutica, anno præterito latè suum virus explicans, paucorum mensium spatio fuerit coërcita & propè penitus extincta.

Ergo ex aëris & diætæ vitio scorbutus.

Proponebat Lutetiæ **GUILLELMUS LAMY,**
Constantiensis, A. R. S. H. MDCLXXI.

PARISIIS,

Ex Typographia FRANCISCI MUGUET, Regis
Typographi, viâ Citharæ.